

四部叢刊續編集部

平齋文集

二

卷十五至卷三十二

據商務印書館一九三四年版重印

---

四部叢刊續編（六七—六八）

平齋文集（二冊） 宋洪咨夔撰

上 海 書 店 印 行  
上海福州路四二四號

上 海 影 印 廠 印 刷

平齋文集卷第十五

內制二

殿中侍御史王遂辭免除戶部侍郎恩  
命不允詔

朕自親政以來臺諫以直聲著者必超軼等級而  
進之所以勸敢言廣忠益也卿氣壯而材茂識高  
而論偉繇分察再遷察非法於殿中暴未殄之惡  
折方萌之姦蹇蹇匪躬聞于天下朕甚器其直稽  
諸政府臺臣以供奉赤墀攝貳版部僅一二見如  
卿即日爲真亦足昭眷簡之殊旌拔之異矣矧嘗  
考覈郡國計簿具見本末理財有疏義利之辨尤

嚴今特舉而措之毋多遜所辭宜不允

戶部侍郎趙立夫辭免除戶部侍郎  
恩命不允詔

小司徒掌建邦之教灋令貢賦抑其細也而後世  
專以理財爲職卿本固而末茂外寬而內明踐駁  
所至務以有餘不敢盡之意寓於政事攝貳地卿  
恂恂如不能言而鈎索原委檢覈滲漏吏無所容  
其欺心計精矣就俾爲真用懋前業夫天下大計  
分隸四總其入于版曹者纔二十七郡生寡而食  
衆用疾而爲舒故常患不澹鞭筭笏畫之長朕方  
以陳恕望卿勿辭可也所辭宜不允

權刑部侍郎李性傳辭免除禮部侍郎  
恩命不允詔

有虞氏命伯夷作秩宗曰夙夜惟寅直哉惟清寅  
故直直故清也知此然後可以爲禮樂之官卿務  
敬以直內之學有淵乎似道之風甘泉之論思露  
門之勸講責難陳善備鑿忠益而不汲汲於進寅  
直清矣若昔折民惟刑與降典相爲表裏疇庸邦  
憲之平正序春官之貳選妙望華朕命惟允齊仲  
孫來省難知魯秉周禮而不敢動晉欲服楚必先  
大蒐被廬示之禮時方多艱卿其思所以尊吾國  
者徒鳴其謙非朕所望所辭宜不允

欽定四庫全書  
五經集解卷二  
權兵部侍郎趙彥誠辭免除兵部侍郎  
恩命不允詔

卿學問造乎精微論議根乎正大垂紳端笏於朝  
蓋麟之儀儀鳳之師師也引年告歸朕以金華之  
業未竟擢繇武部之最就進貳卿之真亦可爲勉  
留矣而猶以歸諗歷觀在廷菑菑黃髮我尚有之  
而公族之年耆德明孰踰卿者四郊多壘主憂則  
臣辱同姓之老方與國同其戚休而忍不爲朕修  
九伐之灤明七德之武遽舍之去乎其彊起就厥  
位所辭宜不允

朝議大夫新除兵部侍郎兼國史院編

修官實錄院檢討官兼崇政殿說書趙彥誠辭免陞兼同修國史實錄院同修撰恩命不允詔

經者道之綱也史者事之紀也八書十志而下述作紛紛經學之不明也深於經則必良於史卿學有師傳晚造自得邇英論說折微抉隱多先儒所未發用力於經深矣典謨歷代之軌範春秋百王之繩墨記言動者祖焉卿能以經法爲史法品藻實錄方將軼遷董而上之進參纂修尚奚遜所辭宜不允

特進左丞相兼樞密使鄭清之等奏爲

雷發非時乞賜罷黜家居待罪不允詔

自昔有國之患莫大於君臣玩天變而不知懼間者雷湧發於首春雷君象也燁燁震電不寧不令朕方引咎修省卿等亦以陽不歛藏俟罪于家上下相與儆懼若此吾國其庶幾乎漢丙魏同心輔政風雨災變時氣失節皆惕然以爲已憂而中興之治成卿宜一乃心德圖所以回天意者移災股肱非朕志也明發其率百辟以朝端朔所請宜不允

特進左丞相兼樞密使鄭清之等奏爲  
蒲散 天基聖節乞許免肆筵不允詔

朕惟天心仁愛人君故出災異以譴告之星雷示  
變天所以大儆朕也而卿等職思其憂莫不震恐  
引慝可謂得交修之誼矣然損貴酌損節戒苦節  
禮以義起必惟厥中朕於誕日既寢上壽之禮群  
臣嘉賓之式燕可盡略乎勉體示慈之意毋勤引  
避之嫌所辭宜不允

太中大夫同知樞密院事兼參知政事  
鄭性之奏爲雷電非時乞賜顯加黜罰  
不允詔

迺立春再翼日庚戌殷雷始發又再翼日壬子而  
震少陽驟洩恐懼靡寧故預戒百官天基節寢介

壽輶用樂庶幾上答天譴卿乃謂咎在臣等乞加顯黜昔我仁祖以春雷爲異明詔責躬曷嘗歸過股肱卿宜悉心輔朕以兢兢致福勿復辭費所請宜不允

工部尚書李鳴復辭免玉牒兼侍讀恩命不允詔

周小史掌邦國之志莫繫世辨昭穆師氏以嫩詔王居虎門之左司王朝自唐以來璽牒之纂修經幃之誦說蓋昉諸此而兼其長爲難卿耆御史之冠曳尚書之復聲稱籍甚而執春秋一經以陪緝熙之講尤多所發明朕孰察所韞閣中而肆外故

以開元褚無量開成李衢之職兼命之進而勸讀  
則明引君於當道之謹退而撰次則用大事書於  
策之法恢乎有餘地也所辭宜不允

戶部侍郎王遂辭免同修國史實錄院  
同修撰恩命不允詔

文以氣爲主職史事者有直氣則無曲筆卿以學  
問養集義之氣頃爲御史不爲強禦屈剛且直矣  
進升言語侍從之職參舉紀傳編年之法以前日  
之是非一時者榮辱百世均是氣也况司馬遷之  
進姦雄崇執利班固之否正直輕仁義曾莫能當  
卿麾訶之餘鋒一代大典久未就緒非卿其誰宜

爲所辭宜不允

兵部侍郎趙彥誠辭免侍講恩命不允  
詔

元祐中程頤爲說書以敬涵養君德范祖禹爲侍  
講以和開導主意親學士大夫之益如此朕知卿  
和而能敬始進之以頤今進之以祖禹德性之迪  
意嚮之正惟吾宗老是準異擯來上謂究心自得  
而無能悟主朕實愧焉雖然學有緝熙于光明佛  
時仔肩示我顯德行亦惟卿勉之所辭宜不允

特進左丞相兼樞密使鄭清之金紫光  
祿大夫右丞相兼樞密使喬行簡再上

奏爲雷發非時乞賜罷免退伏田里不允不得再有陳請詔

春秋書三月大雨震電夏正月也劉向謂雷未可以發而發陽不能閏陰之象故邇者雷發於春始朕甚懼焉丞相與國同其戚休旣夙夜薰心圖答譴告積陰隨霽矣而猶執咎不自己夫勃天之命惟時惟幾元首股肱交相儆戒固應天之實然宣王遇災而懼側身修行詎嘗分過於申伯仲山甫哉況今外患未弭內治未飭朕方倚丞相如左右手其安厥位懋我政事以保乂我有夏穆我天緯母輕於奉身而退以孤朕也所請宜不允

端明殿學士宣奉大夫李臺上表辭免  
除資政殿學士知眉州恩命不允詔

朝廷以耆儒而尊故國以世臣而重朕萬里召卿  
期以爲股肱心膂詎肯使一日去脩門哉惟西土  
嘗不靖朕爲之廢寢食者累月峨英岷秀盡萃王  
庭鄉大夫之舊德宿望莫有留者拊髀躊躇憂顧  
無所寄然後知季良在隨廉頗用趙之足以重鄉  
國也輒經幄之優進書殿之重高牙大纛歸鎮鳴  
珂薦紳父老念疇昔綏靖之勲猶在必動色相告  
坤維可無憂矣况峻職以尚賢即家而爲守在蜀  
纔止一人朕於卿可謂盡體貌之宜往哉母以中

外爲間所辭宜不允

端明殿學士宣奉大夫李臺再上表辭

免除資政殿學士知眉州恩命不允詔  
孔子自衛而反魯孟軻去齊而歸鄒弗逢其時乃  
諉諸命鄉心存於致主朕志切於用賢將以有行  
未爲不遇曩頻年外服嘗著績於制垣今再歲中  
朝遂眠班於執政雍容勸讀繙繙給扶顧圖任之  
念未忘何引謝之章屢至躋隆名於秘殿建巨屏  
於故鄉歷考前聞罕見近比相如之諭蜀道方來  
弩矢之迎買臣之守會稽何勤印綬之上諒薄言  
於畫繡尚遠告於辰猶所辭宜不允

太中大夫守兵部侍郎淮南東路安撫  
制置使兼知揚州軍州事趙葵以護邊  
無狀乞賜罷歸不允詔

善射或失於百命中之餘良醫多得於三折肱之後此操危慮深者所以達也卿蚤懷智略銳赴事功雖鳴効伊吾之志未酬而堅壁細柳之風猶在渠荆倣擾淮獨晏然涉歷多而識慮老可與圖守矣邊烽少歛亟上歸請兵法曰毋恃其不來恃吾有以待之賊情叵測吾圉尚疏卿宜日討軍實思敵王愾其可遽奉身而退乎所請宜不允

太中大夫守尚書戶部侍郎兼刪修勅

令官趙立夫乞畀叢祠不允詔

漢張蒼爲計相更以列侯主計唐劉晏自度支領租庸鹽鐵至僕射猶領使如舊理財不宿其官簿書放紛吏並緣爲姦利雖竭江河之入莫供尾閭之泄也卿踐更中外之久財賦脉絡洞燭表裏而姿稟靜固精力彊又足以行之左戶爲真朕方委重閣日幾何遽以春衣辨集而求均佚蒼晏職業僅以是自諉耶維時調度孔殷尚究爾才母曠吾事所請宜不允

朝奉大夫權工部尚書時暫兼權吏部尚書兼修玉牒官兼侍讀李鳴復辭免